

Ooldejaorsaovend

Ni'jjaorsdag

donderdag

vri'jdag

31

1

december

week 53

jannewaori



Et oolde moet et ni'je verdienen
*(de oolde spullen moe'n eerst bruukt wodden totdat ze
of binnen, dan pas moej' ni'je dingen kopen; Steggerde)*



2015/2016



Sjoukje Oosterloo

Et volgende kastfeest

Inienen vien ik niks meer an de kastboom. Ik dochte eerst da'k him nog een hiele poze staon laoten zol, veur de gezelligheid. Mar as ik halverwege de eerste dag van jannewaori

gammel beneden kom, is die kastboom in mien ogen inienen een stom ding wodden. Butendat lat hi'j de naalden ok nog valen. As ik mit lange tanen mien morgenbroggien zitte behaffelen, schrik ik d'r van as de tillefoon rattelt. Oflopennaacht was d'r weergien deurkommen an. As ik mien naosten een gelokkig ni'jjaor weensken wol, ha'k dat beter halverwege de aovend al doen kund. De aovend zels was een groot sukses. Ik kon mar niet genoeg kriegen van mien zelsmaekte Glühwein, dat ik vanmorgen an mien zwaore heufd wel merken kan. Gien kaortspullegien heb ik wunnen, marik heb hiel wat oflacht. Middernaacht, om twaelf ure, was ik niet zo slim onder de indrok, zoas eertieds, doe we mekaander mit traonen in de ogen iewige trouw beloofden. Al rap was mien vesite verdielt in twie kaampen. De iene helte wol mit een glas in de haand vanuut de kaemer naor et vuurwark kieken, wiels de eren heur niet ofschrikken leuten deur et duvelse geweld op straote.

Et was een aovend zoas de laeste aovend van et jaor wezen moet, waarm, vrolik en dierber. Spietig dat de dag nao al dat feestgedruis zo vreemd is, mit in huus nog de locht van euliebollen en appelflappen, waor as nog een staeltien van overbleven is. Krekkengelijk as aandere jaoren had ik ok weer vusen te vule ooldejaorshappies maekt. Omreden d'r zovule meensken zo dom weren om in december al te beginnen mit lijnen. In plaets dat ze heur eerst nog es goed vol eten en dan op drie jannewaorie beginnen mit maotigen, mar nee heur, domhied van de boverste plaanke! Zodoende is al mien kreatieve happieswark in de grune kontener belaad. En now is et dus jannewaori, die vremde maond van et jaor, waor hielendal gien fesien meer in te bekennen is. Butendat is et ok nog slim koold. En omreden d'r gien passende meziek is die bi'j et oftugen van een kastboom heurt, begin ik in alle stilte de kastballen d'r ien veur iene uut te haelen, en wikkel ze weer in et vloeipectier. As ik de versiering in de deuze pakt heb, breng ik mit een gevuul van weemoed et spul naor de zolder. Daor ligt et dan, tot et weer opni'j kastfeest wodt.